



10. januar 2011

UPA2011/93

Inatsisartut suleriaasiat § 33 naapertorlugu inatsisartut aalajangiiffigisassaattut siun-nersuut matumuuna saqqummiuppara.

Aalisarneq pillugu inatsisartut inatsisaata nr. 18, 31. oktober 1996-imeersup kingusinnerusukkut allannguutitallip kingusinnerpaamik UKA2011-imut allanngortinneqarnissaa pillugu taamaalilluni 1. Januar 2012 aallarnerfigalugu aalisartut aalisarsinnaanermut akiliuteqartinneqartarnerat pisussaajunnaartinneqarlugu Naalakkesuisut peqquneqarnissaannik Inatsisartut aalajangiiffigisassaattut siunnersuut.

(Inatsisartuni ilaasorta, Ruth Heilmann Siumut)

Tunngavilersuut:

Taamatut akiliuteqartitsisalerneq aallartimmalli aalisartunit akuersaarneqanngilluinnarsimasoq tamatta ilisimavarput. Atuutsinneqarnera pillugu 5.januar paasiniaaninni Maniitsumut tunngatillugu aalisartut tunisisinnaanngillat, pissutaalluni suli Aalisarnermut Pisortaqarfimmit allagartanik apuuttoqarsimannginnera peqqutigalugu, tassalu aalisartut inuutissarsiutiminnut aningaasarsiornissamut allaat taamaalillutik mattunneqarsimasutut oqaatigineqarsinnaallutik tamanna naammaginangilluinnarpoq akuersaarneqarsinnaanngilluinnarlunilu.

Taamatut inuussutissarsiutaannik mattussineq imatut kingunerluuteqarpoq ilaqutariit inuuniutaannik mattussinermik, naak illumut innaallagissamut allatigullu akilersuinissaminnut aningaasartuutitut matussutissaat isertitassaraluaminnummi annaasaat kiap matussusissammagit? Aalisartut immikkut pisortaniit ikiorserneqarsinnaanngitsut aalisarnissaannut akiliuteqarnissaannik piumasaqarfigineqarsinnaanerat nunatsinni atuutissalluni naleqqutinngilluinnartup atorunnaarsinneqartariaqartoq inatsisartut aalajangertariaqarpaat.

Siunnersuutip aningaasatigut kingunissai

Siunnersuutip akuerineqarneratigut aalisartut akiliutigisartagaat aningaasanngorlugu 2,9 mio. kr. missaaniittut nunatta karsianut isertinneqartarunnaassapput kisitsisit 2010mut tunngasut aallaavigaanni akuersissutit katillugit 1.955-it tunniunneqarsimasut.

Siunnersuutip allaffissornikkut kingunissai

Siunnersuutip akuerineqarneratigut allaffissornikkut annertunngitsumik atuiffiussaaq, allaffissornikkut atuneq annertunerpaaq inatsisip allanngortinneqarneranut atorneqassalluni taamaaliornerlu naatsorsuutigineqarsinnaavoq inuup ataatsip ukiumoortumik suliarisinnaasaata naatsorsornerani 1/12 atorneqassasoq. Taassuma saniatigut inatsisip inatsisilerituup naleqqussareerlugu naammassinerani nutsertinneqarnissaa ilanngutissalluni.